



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK



Vogošća, ul. Jošanička br. 80, tel: 00387 33 586-411

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 71, 124. i 125. Statuta Općine Vogošća („Službene novine Kantona Sarajevo“, broj: 27/14 - Prečišćeni tekst i broj: 14/15, 9/20 i 23/24), Zakona o osnovama socijalne zaštite, zaštite civilnih žrtava rata i zaštite porodice sa djecom („Službene novine Federacije BiH“, broj: 36/99, 54/04, 39/06, 14/09, 45/16, 40/18 i 16/23), člana 171. Zakona o socijalnoj zaštiti, zaštiti civilnih žrtava rata, zaštiti porodice sa djecom („Službene novine Kantona Sarajevo“, broj: 38/14 – Prečišćeni tekst, 38/16, 44/17, 28/18, 52/21, 40/22 i 13/25), Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj: 37/24) i Odluke Općinskog načelnika o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik Općine Vogošća, donosi:

P R A V I L N I K
o kriterijima i raspodjeli novčanih sredstava za dodjelu
jednokratne novčane pomoći licima u stanju socijalne potrebe sa područja općine Vogošća

Član 1.
(Predmet)

Ovim Pravilnikom o kriterijima i raspodjeli novčanih sredstava za dodjelu jednokratne novčane pomoći licima u stanju socijalne potrebe sa područja općine Vogošća (u daljem tekstu: Pravilnik) uređuju se kriteriji i način ostvarivanja jednokratne novčane pomoći licima i porodicama u stanju socijalne potrebe sa područja općine Vogošća.

Član 2.
(Cilj)

Cilj jednokratne novčane pomoći je ublažiti trenutno stanje socijalne potrebe u kome se nalazi pojedinac, odnosno porodica.

Član 3.
(Korisnici socijalne zaštite po Federalnom zakonu)

Na osnovu Zakona o osnovama socijalne zaštite, zaštite civilnih žrtava rata i zaštite porodice sa djecom, korisnici socijalne zaštite su lica koja se nalaze u stanju socijalne potrebe i to:

- 1) djeca bez roditeljskog staranja;
- 2) odgojno zanemarena djeca;
- 3) odgojno zapuštena djeca;
- 4) djeca čiji je razvoj ometen porodičnim prilikama;
- 5) lica sa invaliditetom i lica ometena u fizičkom i psihičkom razvoju;
- 6) materijalno neosigurana i za rad nesposobna lica;
- 7) stara lica bez porodičnog staranja;
- 8) lica sa društveno negativnim ponašanjem;
- 9) lica i porodice u stanju socijalne potrebe kojima je uslijed posebnih okolnosti potreban odgovarajući oblik socijalne zaštite.

Član 4.
(Stanje socijalne potrebe po Federalnom zakonu)

Lice odnosno porodica u stanju socijalne potrebe, kojima je uslijed posebnih okolnosti potreban odgovarajući oblik socijalne zaštite, u smislu navedenog člana 12. tačka 9) iz člana 3. Pravilnika smatra se lice, odnosno porodica koja se nađe u stanju socijalne potrebe zbog pretrpljene prisilne migracije, repatrijacije, elementarne nepogode, smrti jednog ili više članova porodice, povratka sa liječenja, otpuštanja sa izdržavanja kazne zatvora ili izvršavanja odgojne mjere.

Član 5.
(Socijalna potreba, korisnici socijalne zaštite i zajedničko domaćinstvo po Kantonalnom zakonu)

- 1) Socijalnom potrebom u smislu Zakona smatra se trajno ili privremeno stanje u kome se nalazi građanin ili porodica, prouzrokovano ratnim događajima, elementarnim nesrećama, općom ekonomskom krizom, psihofizičkim stanjem pojedinaca ili drugih razloga, koje se ne mogu otkloniti bez pomoći drugog lica.
- 2) Osobe i porodice koje se nađu u stanju socijalne potrebe iz razloga koji nisu propisani Federalnim zakonom, na osnovu mišljenja stručnog tima Službe, mogu ostvariti pravo na jednokratnu ili izuzetnu novčanu pomoć na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom. Na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom korisnici socijalne zaštite, pored korisnika utvrđenih Federalnim zakonom su i:
 - osobe i porodice koje bi svoju socijalnu sigurnost trebale ostvariti od primanja, a ta primanja nisu dovoljna za podmirenje njihovih osnovnih životnih potreba;
 - osobe izložene zlostavljanju i nasilju u porodici.
- 3) Zajedničko domaćinstvo je ekonomska zajednica jedne ili više porodica u kojoj se zajednički stiču i troše novčana i druga materijalna sredstva stečena radom i korištenjem zajedničkih materijalnih dobara.

Član 6.
(Nadležnost)

Poslove u vezi ostvarivanja prava propisanih ovim Pravilnikom obavlja općinska Služba za boračko-invalidsku i socijalnu zaštitu.

Član 7.
(Sredstva)

- 1) Sredstva za dodjelu jednokratne novčane pomoći utvrđuju se u Budžetu Općine Vogošća za svaku kalendarsku godinu.
- 2) Raspodjela se vrši u skladu sa raspoloživim sredstvima.

Član 8.
(Javni poziv i potrebna dokumentacija)

- 1) Sredstva se dodjeljuju na osnovu Javnog poziva koji se objavljuje na oglasnoj ploči i web stranici Općine i ostaje otvoren do kraja kalendarske godine ili do utroška sredstava.
- 2) Jednokratna novčana pomoć dodjeljuje se na osnovu podnesenih zahtjeva.
- 3) Zahtjevi se podnose Službi za boračko-invalidsku i socijalnu zaštitu.
- 4) Zahtjevi se rješavaju po redoslijedu podnošenja.
- 5) Dokumentacija je propisana u posebnom obrascu koji je sastavni dio Javnog poziva.

Član 9.
(Uslovi ostvarivanja prava na jednokratnu novčanu pomoć)

Uslovi za ostvarivanje prava su:

- 1) da podnosilac zahtjeva ima prebivalište na području općine Vogošća najmanje 1 (jednu) godinu neposredno prije podnošenja zahtjeva za dodjelu jednokratne novčane pomoći;
- 2) da je lice, odnosno porodica u stanju socijalne potrebe definisano čl. 4. i 5. ovog Pravilnika;
- 3) da niko od članova domaćinstva podnosioca zahtjeva nije vlasnik preduzeća ili samostalne radnje niti ima registrovanu dopunsku djelatnost;
- 4) da niko od članova domaćinstva podnosioca zahtjeva nije ostvario drugi vid jednokratne novčane pomoći putem Službe za boračko-invalidsku i socijalnu zaštitu.

Član 10.
(Pravo na ostvarivanje jednokratne novčane pomoći)

Jednokratnu novčanu pomoć mogu ostvariti lica u stanju socijalne potrebe i to:

- 1) Pojedinci ili domaćinstva koji nemaju nikakvih prihoda ili;
- 2) Pojedinci ili domaćinstva kojima ostvareni mjesečni prihod ne prelazi iznos od 40% prosječne plaće ostvarene u Kantonu Sarajevo u prethodnoj godini u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom, osim u izuzetnim i opravdanim okolnostima koje će se cijeliti u svakom konkretnom slučaju, o čemu Komisija daje obrazloženo mišljenje.

Član 11.
(Visina prihoda)

Ukupni prihodi domaćinstva kao uslov za ostvarivanje prava po ovom Pravilniku čine prihodi koji članovi domaćinstva ostvaruju po osnovu:

- 1) plaće i drugih primanja, izuzev naknade za topli obrok, naknade za prijevoz na posao i sa posla;
- 2) starosne, invalidske i porodične penzije;
- 3) poljoprivredne djelatnosti;
- 4) primanja po propisima iz boračko-invalidske i socijalne zaštite civilnih žrtava rata;
- 5) primanja po osnovu socijalne zaštite, izuzev primanja po osnovu novčane naknade za pomoć i njegu od strane druge osobe i dodatka za njegu i pomoć od druge osobe;
- 6) primanja po osnovu prava na ličnu invalidninu po svim osnovama, izuzev u postupku ostvarivanja prava na stalnu novčanu pomoć, novčanu naknadu za pomoć i njegu od druge osobe i dodatka za njegu i pomoć od druge osobe;
- 7) prihoda ostvarenih po osnovu imovinskih prava;
- 8) prihoda ostvarenih po osnovu autorskih prava;
- 9) prihoda ostvarenih po osnovu privrednih, uslužnih i drugih djelatnosti;
- 10) prihoda po osnovu registrovane dopunske djelatnosti.

Član 12.
(Postupak za ostvarivanje prava)

- 1) Postupak za dodjelu jednokratne novčane pomoći provodi Komisija imenovana od strane Općinskog načelnika.
- 2) Općinski načelnik imenuje Komisiju za pregled prispjelih zahtjeva po osnovu Javnog poziva iz člana 8. ovog Pravilnika.
- 3) Komisija će u svakom konkretnom slučaju, iznos odobrenih novčanih sredstava utvrditi na osnovu socijalno materijalnog statusa podnosioca zahtjeva, broja članova domaćinstva i zdravstvenog stanja.
- 4) Nakon što Komisija utvrdi da su ispunjeni uslovi propisani ovim Pravilnikom, Općinski načelnik putem nadležne Službe donosi Rješenje na prijedlog Komisije.

- 5) Zahtjevi koji ne ispunjavaju propisane uslove za dodjelu novčanih sredstava, kao i zahtjeve podnesene nakon utroška sredstava predviđenih za ove namjene, odbijaju se Zaključkom Općinskog načelnika putem nadležne službe na prijedlog Komisije.
- 6) Protiv Zaključka može se izjaviti žalba Drugostepenoj stručnoj komisiji Općinskog vijeća u roku od 15 dana od dana prijema Zaključka.
- 7) Podneseni zahtjev važi samo za kalendarsku godinu u kojoj je zahtjev podnesen.

Član 13.
(Isplata jednokratne novčane pomoći)

Isplata se vrši na transakcijski račun podnosioca zahtjeva putem Službe za budžet i finansije.

Član 14.
(Visina jednokratne novčane pomoći)

- 1) Jednokratna novčana pomoć se dodjeljuje najviše do visine 20% prosječne neto plaće ostvarene u Kantonu Sarajevo u prethodnoj godini, a u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom. Jednokratna novčana pomoć može se dodijeliti korisniku u okviru jednog domaćinstva najviše tri puta u toku jedne kalendarske godine, u ukupnom iznosu koji ne prelazi visinu izuzetne novčane pomoći utvrđenu navedenom Instrukcijom.
- 2) Izuzetna novčana pomoć se dodjeljuje do visine 40% prosječne neto plaće ostvarene u Kantonu Sarajevo u prethodnoj godini, a u skladu sa važećom Instrukcijom o iznosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodice sa djecom i može se dodijeliti istom korisniku samo jedanput u toku kalendarske godine.

Član 15.
(Izuzetna novčana pomoć)

- 1) Osobi koja se nađe u stanju izuzetne socijalne potrebe može se dodijeliti izuzetna novčana pomoć.
- 2) Izuzetna socijalna potreba je potreba koja se ne može zadovoljiti jednokratnom novčanom pomoći.

Član 16.
(Prestanak važenja)

Stupanjem na snagu ovog Pravilnika, prestaje da važi Pravilnik o uslovima, načinu i kriterijima za odobravanje jednokratne novčane pomoći licima u stanju socijalne potrebe sa područja općine Vogošća, broj: 09-31-1238/25 od 13.06.2025. godine.

Član 17.
(Stupanje na snagu)

Ovaj Pravilnik stupa na snagu narednog dana od dana objave na oglasnoj ploči i web stranici Općine Vogošća.

Broj: 09-31-101/26
Vogošća, 28.01.2026.godine

OPĆINSKI NAČELNIK

Migdad Hasanović